

居業堂文集

五





居業堂文集

(五)

王源著

王雲五主編
叢書集成初編
居業堂文集
五冊

中華民國二十五年十二月初版

嚴

著者 王源

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

居業堂文集卷十七

墓誌

進士吳君墓誌銘

以余所聞登賢書成進士。未及仕以死。而生平孝友著於家。以濟物扶危爲己任。行孚於鄉里。無閒於士大夫之言者。高郵吳君萬子其人也。余初見其制舉文。原本經術。而其體悉合乎先輩法程。及讀其詩古文。莫非表章忠孝懿行。述江淮疾苦。而殷然於農政河渠富民之策。嗚呼。萬子豈特文章足稱。實負經濟才可肩國家興教化康阜斯民之任者。乃不能爲朝廷徧其澤於天下。徒被之一家一邑。而未竟之志。託諸空言以自見。可悲也。萬子諱世傑。先世吳人。遷高郵。代有隱德。祖諱某。嘗輸粟賑飢。父某尤好施予樂善。母鄭孺人事舅姑孝。子四。萬子其長也。十四歲補弟子員。壬子舉於鄉。乙丑會試成進士。時萬子以古文名籍甚一時。名流莫與競。公卿貴人交口贊譽之。而殿試三甲後。館選不得與。人皆爲萬子惜。時進士館選外率以知縣用。萬子夷然曰。縣令親民事。仁民吾志也。得行志焉。何惜乎。性至孝。母病篤。嘗籲天自代。而母立愈。友愛諸弟備至。自幼親督課教之成。叔弟世烈丁卯選拔貢生。季弟世燾戊辰進士。授翰林院庶吉士。而季之會試京師。爲文送之。勉其成名慰父母。已卽娛親不復仕。乃季得雋方半載。而萬子逝。季流涕語人曰。吾兄善朱蒙麻。志意怫鬱而弗宣。功名否闕弗顯達。徒使白髮哭於堂。鰥孤哭於室。

天之報施何如哉。嗚呼。萬子於父母兄弟如此。而年四十有八方強仕。假令出宰一方。功名必足卓然當代。乃不幸竟未一試而殞其生。豈不可爲當世悼歎搥腕而深惜乎。乃其自舉於鄉。凡耳目所及。餓窮流離患苦。不憚狂奔疾呼爲之救。卽力所不逮。時與勢之所阻。必焦思殫精。務求其濟。乃已。終歲率爲人奔走勞瘁。而居室安樂之日無什一焉。則其利濟之及於物者。亦已多矣。高郵役法弊。奸吏率假公科民。民日困。湯中丞潛庵巡撫江南。萬子再上書請更法祛其弊。中丞從其請。民大蘇。吳耿之亂。婦女多被掠至江甯。萬子傾橐兼募好義者金。贖還者甚衆。其成進士歸也。郵大水。暴風雨三日。夜平地水丈。村舍悉蕩沒。浮靄蔽波。人或緣樹杪附敗屋脊以避。頃之隨波去。萬子大痛曰。吾可以獨生。急募舟往救。全者數十百人。而流屍瘞且無算。遠近稱之。萬子天資穎悟而篤厚。勇於爲善。汲汲恐不及。家無中人產。而師友姻戚之死無以殮者。殯之。孤子女婚之。嫁之。飢寒爲人奴者贖之。無辜罹刑獄救之。節烈冤抑伸之。飢民之流離者。告當事請巨室以賑之。癘疫藥之。寒襦之。買舟給資歸之。易簣之際。猶出金付乃翁。屬戚友未婚娶者完之。亡友之女。鬻勢家者贖而聘之。嗚呼。萬子未嘗一日居得爲之位。乃其德之所被。積善之所留。校今之司百里以上。凡操造福之權之人。果孰得而孰失乎。然則萬子雖死。可以不恨。萬子娶夏氏。側室殷氏。男二。女三。男遇登方七歲。遇泰猶襁褓。乃識者知其後必達也。萬子生於前崇禎辛巳五月八日巳時。卒於今康熙戊辰七月十七日巳時。卒五年壬申某月日。將葬於其鄉之某原。其弟以狀來請銘其墓之石。乃述其生平而爲之銘曰。匹夫而利天下。人皆以爲難。苟隨分以濟物。亦何力不能殫。吳君之德。積

於家者厚。而施於物者寬。何必尊其位高其官。原有檀。隰有蘭。川縈紆。氣鬱盤。嶺兮峴兮。宅以安。

文林郎中書科中書舍人侯君墓誌銘

君姓侯氏。杞人。諱元棐。字友召。人稱之曰兔園先生。以辛丑進士知湖州德清縣。擢中書科中書舍人。外艱卒於家。卒十有三年。其子方曾請某爲其墓之銘。以藏於廟。謹按狀。君高祖諱于趙。都察院右都御史。巡撫山西。曾祖諱應瑜。以鄉薦知泰安州。歷鄖陽知府。而諱邦甯者其祖。諱體巽者其父。俱邑庠生。父封文林郎。德清縣知縣。君性至孝。當明末造寇亂。舉家竄徙。時年十五。常懷乾餼。供親祖母。卒客邸。父母同患癘疫。君雪涕經營調護。流離險艱。備至。久之。復歸里。郭外皆土寇。城中斗米錢二千。君日率兩弟採柳絮。挑菜甲。雜糠爲食。而父母甘旨未嘗缺。未幾。大清兵渡河。中原悉歸附。杞始安堵。然家中落。於是教授鄰邑爲養。而以不能時奉大父。父母色笑。輒爪其胸。胸痕血縷。縷不絕。見者悲之。君生於天啓丁卯。稍長。日誦千言。時生計窘。封君嗜飲。每夜篝燈一。君撥火執罍侍。封君且飲且授君書曰。吾與若祖晚年惟視若。若不力學。更誰望乎。於是君益刻厲。十一歲應童子試。不售。文爲里中傳誦。後輾轉他鄉。戎馬未嘗廢學。年十七補弟子員。鼎革後舉辛卯鄉薦。辛丑成進士。己酉除知德清縣。於是始得祿以養。乃居官八年。善政不可勝紀。而家無餘資。庚戌秋。霪雨害稼。君籲上官。請命中丞范公承謨按覈之。君力陳請。淚應聲落。災民數萬號泣動地。范公歎曰。侯君眞民父母也。前令陳救荒策。乃條三事以上。一曰。借庫金通糴。平穀價。二曰。折蠲糧稅。免流亡。三曰。輸穀納監。以富民養貧民。范公一一奏請。乃復請發米千石。勸民輸米。

二千石。煮粥食飢者。又發平價米八千一百石。分極貧次貧。給符驗糴。范公亦發賑米九百二十石。凡活九萬二千三十五人。於是民困大蘇。次年又苦旱。君爲文以禱。旬日。甘露降於禾如漿。大雨霑足。而壬子蝗災。復以全荒。請蠲折如庚戌。兩年共免四萬餘金。糧六千餘石。邑人至今頌之。范公之撫浙也。馭下嚴明。不稍貸。初覈災傷時。守令無敢發一語。癸丑。君以歲饑。復請發米千八百石。錢四百萬賑之。分守嘉湖道參議某。以范公檄稽覈屬吏。微服入德清。見其給賑。寂然無譁。飢民悉得實惠去。歸白范公。公曰。吾固廉其賢也。檄他邑爲法。而手書勞之。其見重如此。初。德清居霽水上。當天目下流。設斗門版牕隄塘。備瀦洩。久不治。易浸涸。而人丁詭寄。俗健訟。多盜。漕胥汎兵勢。族恣奸害。君脩水道。清編審。講鄉約。嚴保甲。革漕弊。抑豪強。風俗丕變。又念賦重民貧。課民蠶桑。屆期市杭扇數千。手書勸農字。從一二輿隸。徧往驗之所至。婦子爭出筐以視。勞以扇。惰者薄治之。蠶利遂倍於昔。當是時。君再迎封君及曹孺人。就養署中。而王父以年高不得往。封君孺人至。卽旋返。君每以不獲事奉。拊膺飲泣。欲乞休。范公督閩去。志益決。屢請會滇閩叛。兩浙所在竊發。君募鄉勇。脩弓矢械礮。晝夜訓練。太湖寒山賊蜂起。剽劫。獨不敢入德清界。久之。以計閒其黨降之。餘散去。而禁旅南下。供億繁。君如期立辦。里閭晏然。無擾制府武定李公之芳。嘗謂諸將軍曰。侯德清真奇才也。甲寅夏。君大父卒。訃聞。慟幾絕。欲歸不得。丙辰。告休文。一月三上。遂移中書。科中書舍人以歸。未抵舍。封君訃音又至。君搶地泣血。袖淚朱殷。勺水不入口。披髮跣行數十里。號哭入郭門。觀者莫不隕涕。君數年來積勞成疾。至是哀毀逾禮。遂不起。君得年五十二。元配李氏。封孺人。子二。

長方曾甲子舉人。次京曾庠生。女三。適某某。孫四。某某。君爲人平易。不立崖岸。而正直不可干以私。初。澈德清。徵漕糧吏以例金進。杖之。立散還民間。刻石永禁。壬子分校浙闈。檄未下。有以賄請者。叱之去。及居家。厚於宗族故舊。道福鄉里。善難枚舉。卒之日。無親疎。莫不同聲痛悼。公之賢蓋可知矣。銘曰。于嗟侯君。孝稱純。幼遭閔凶。勤且辛。雪溪之水流清淪。移孝作忠。何振振。殫心乃職。瘵乃身。毀以滅性。成其仁。彼蒼不憖遺哲人。我銘斯石。志不泯。

封君甯獻賢墓誌銘

潁州甯獻賢先生子世簪官太史。與源定交京師。時源父年八十。遁迹江淮數十年。同志故友俱歿。先生年七十有三。生於明萬歷四十八年庚申。而源父生於癸丑。源既與太史約爲兄弟。期移家潁水上。奉老親與先生共晨昏杖履。優游林壑。孰意先人以癸酉終。越四年丙子。先生亦卒。嗚呼。老成凋謝盡矣。況以所聞先生懿行。皆人所難者。可不傳乎。先生性孝友。重義。恂恂退讓。能忍辱。有大度。父諱某。以進士官戶部。甲申病歸卒於家。先生終身哀慕如一日。厚撫諸弟。事叔父如事父。遭變罹大難。儼薄乘勢轆迫。先生不與校。琴書坐嘯晏如。豪強往往消沮罷去。曰。此長者也。從而化之。明自隆萬以來數十年。四海昇平。世家益驕貴。怙侈。不肖者橫噬鄉黨。既而大亂鼎革。兵火被天下。鉅族豪家蕩滅。而市井多崛起。恣睢淫威逞報復。先生家故勳舊。始祖諱某。以功拜羽林衛指揮。同知世襲。後移鎮潁州。十一世至先生。先生曾祖諱某。以科第顯。官尙寶司卿。父又繩其祖武。累世華胄。而樸拙恂謹如寒素。先生一守其家法。故雖遇變。

多外侮終不被其禍生平多隱德少游武林館一豪帥家有美姬夜奔先生先生驚起力拒之端坐遲明拂衣而別又有以千金賂謀非義者毅然卻之不顧先生既歿之明年太史以書致源曰我兩人同抱終身長恨求如京邸促膝望白雲之下臨風雪涕已不可復得先人卜葬今秋誌銘惟子是望嗚呼源與太史偕隱養親之志久矣每握手歔歔謂吾兩人親俱老正人子愛日之年不可不早爲計毋致他日之悔太史自癸酉典試黔中病歸猶侍先生色笑者三四載源則餬口四方未嘗盡一日之養而親遽歿悲夫悲夫人子之幸不幸何如也得書嗚咽流涕累日夜不能成章久之乃據狀而爲之銘按先生諱某年十六補弟子員天姿敏妙爲文深雋警動工書法中年以後絕意進取子貴封文林郎翰林院編脩元配劉氏贈孺人子七太史其長也次世珮世標世纘世溥世裔世奇標太學溥府庠生珮纘早卒裔出繼五女俱適士人孫五濂洽滄浚沆先生教子孫以正終身無所苟嘗書諭太史曰淡素吾志也奢卽不孝謙退吾志也矜卽不孝謹物恆吾志也肆卽不孝又曰人心日下縱不能以一身迴旣倒之瀾而潛居藏脩不得罪名教使祖宗之澤不自我而盡亦可矣臨終猶書遺訓曰違心之事不可行傷心之言不可道嗚呼如先生者可謂君子人矣銘曰

厚載物光沕沕波頽流德弗鬱終則伸始則屈久愈昌宅岷岫

蔣退庵太學墓誌銘

蔣退庵太學諱進字度臣金壇人父諱鳴玉崇禎丁丑進士官兵科給事中兄諱超順治丁亥探花官翰

林院侍讀。其家世俱詳侍讀誌狀中。退庵六歲而孤。兄撫之成。九歲能詩文。長以詩名。而性至孝。篤於兄弟。忼慨重然諾。喜交游。最愛高節義烈魁奇之士。一女適同邑于節侯之子。其季子則予兄汲公之壻也。嘗謂人曰。吾一子一女皆與忠臣之戚聯姻。勝貴顯多矣。蓋節侯之妻之母爲予從母。適興國王公之子。鎮彝侯鳴謙。興國者名之仁。故定海總兵官。輔魯監國舉義事敗。全家赴海。自至南京就戮而死者也。又嘗謂予曰。吾生平有快事二。一歲暮游歸。出囊金作百餘封。貯之篋。奚童負之。徧詣親友。問何以卒歲良苦。視所需多寡周之。又嘗客歛。歛有土豪奪其宗子祠廟田。宗子貧儒懦。訟之官。官以賂左之。宗子悲不敢與校。豪乃取草履二并紙筆束之。懸其門。呼謂之曰。吾知若欲訟我。無錢市紙筆。且徒跣不能行。今以此贈若。其速控我。我待若行路。皆爲髮指。顧無如之何。予聞之。立言之郡守。卻其千金之贈。使爲平反。而置豪於法。當是時。退庵甫弱冠。而卓犖尙義。其生平豪舉類如此。事兄如父。凡訓誡之言。以錦囊佩之身。雖逆旅孤舟。未嘗不三復自警。母孫宜人奉佛。因事佛。宜人病幾危。刺指血寫佛經。寫罷卽愈。後不起。乃於佛前割臂。祈以身代。旣卒。椎心泣血。死而復蘇者再。伏地七日夜。勺水不入口。鄉里哀之。旣而游京師。數年不歸。交益廣。以濟急扶顛危爲己任。思有所建立。卒不遇。癸酉冬十一月。夢登樓。梯半力竭。暗中有入挈之上。上見月明如晝。左右皆佛像。孫宜人素衣挾蒲團立。見之詫曰。兒何爲來此。佛前兩羅漢侍。拜其右。左以手招曰。彼粥飯僧耳。何足爲汝師。乃拜其左。禱曰。某半生落拓。禱未竟。忽旁一人抄答曰。五載爲郎。默思曰。我未爲郎也。復自續一語云。萬事在心。羅漢乃命檢一蒲團隨宜人去。寤意忽忽不懌。作佛

前自懺詩五章。十二月二十五日。赴友人宴。暮歸。與同寓友飲酒。歡賦詩數首。漏三下就寢。忽嘔噦不能語。黎明卒矣。於戲。退庵與予親如手足。誓以生死。而予奉父兄命。爲兄女擇壻。又重之以婚姻。乃甫締盟。予兄嫂遽相繼歿。癸酉。予舉於鄉。方謀贅壻於家。以承親歡。而先君忽逝。月餘。退庵又逝。自此愆期。凡六年。直至庚辰。始得台登成禮。予痛念父子兄弟存亡之故。與退庵生死之情。加以兒女合離歡戚。時時嗚咽流涕。而女最孝。先君最所鍾愛。每爲壻述先祖父母鞠育之恩。及予撫之教之之義。壻亦以其先人見背。更日相對哽咽不能止。初予兄嫂歿於高郵。先君挈家來天津。是時予已將先妣及兄嫂三櫬扶歸。暫厝天津。乃率女及壻哭拜其墓。以復其命而告成事焉。於是壻再拜乞予爲文誌其父之墓。予流涕許之。而爲之誌曰。退庵生於順治己丑二月二十七日。以庠生游太學。得年四十有五。所著有勞人草。此山中詩餘各一卷。五七言古近體詩四卷。輯經史百家事類名墨農數十卷。娶季氏。癸未進士陝西按察司廉使諱誕生女。子三。岱生。嵩生。衡生。俱庠生。女一。卽適于氏者。孫一。尙幼。名麒。銘曰。嗟彼馮生。爲蒼蒼殯。亦云克灼。爰誦爰讀。顧維鷗鳶。是嚇是逐。白雲吐華。孤蹤獨馥。卓哉蔣子。生彼華屋。有珠在淵。有玉在璞。匪匱匪塗。山川自煜。天之高矣。仰彼飛龍。海之廣矣。需彼培風。君子生矣。質彼蒼穹。君之死矣。奠此幽宮。嗚乎邈矣。流風曷窮。

蔡叔謙墓誌銘

蔡靜子先生之子叔謙名學圃。卒於戊寅冬十月朔。年三十七。時予客南昌。靜子致予書。述其子之生平。

并以其遺文與諸君子贈言示子。請爲誌其墓。按叔謙娶某氏。子女若干。自十一歲隨父出游。磊磊負奇氣。不應試。好爲大言。喜談兵。所至賢豪長者。莫不折節交之。靜子嘗過安陸。叔謙方十六歲。游城北。作記曰。安陸。舊承天府也。明世宗父興獻帝分封於此。世宗入繼大統。因名承天。丁巳秋。予從父至此。寓城北三元觀。觀左有山。從父登覽。父歎曰。此昔陽春臺也。興獻帝嘗作陽春臺賦。臺毀矣。御碑尙存。悚讀愴然欲涕。九日復從游城北。過白石橋。不知何處。又數十步。見黃瓦破碎地上千萬斤。大石碑二。長丈餘。仰臥。勒雙龍升降狀。無一字。更前有大礎石。圍盈丈。數百列地。皆宮殿柱礎。由是乃知卽王城內也。折而東登崇嶺山。山前一碑倒地。糞穢擁聚。載興獻帝九日詠菊花詩。父歎曰。此昔重陽事也。今若此。吾與爾復何至此哉。下山西行。斷碑礎石如前。結屋居者悉營卒。或以黃瓦雜他瓦覆屋上。或半覆茅。半覆黃瓦。或茅屋上更以黃瓦覆其脊。如此蓋百十餘家。其園圃門牆垣牖。皆黃瓦。皆礎石。皆石碑。皆石龍也。老翁數人。揮鋤種菜。見予父子緩步低徊。輟鋤相視。於戲。秦始皇築阿房宮。焚於項羽。興獻帝非秦比。闔賊一炬。遂至此。哀哉。又嘗獨走河北。踰大行。履王屋。出首陽山南之靈寶。遇李村之李沛生。亦奇士。延至家。招賓客。挾伎高歌。酣飲十餘日。結爲兄弟而去。遂西游蜀至成都。與李生書曰。士生斯世。苟得一二知己。山川離別。千萬里外。時相懷問。亦足以砥礪生平。寄託千古。但某自悲。十餘歲。卽好讀孫武。司馬穰苴諸書。稍長。涉獵春秋。左傳。史記。又從家大人游江東。閩。越。徧歷齊。魯。燕。趙。時已及壯而學仍疎。今二十有八年矣。蓋不自悲其貧且賤。竊念古之人如鄧仲華諸公。年二十餘。卽能垂功名於竹帛者。爲可悲也。其他文字。激

昂忱壯。原本忠孝類如此。嗟乎。數十年老成凋喪。既盡。卽予等輩。亦大半不得志以歿。乃後起之英如叔謙者。亦復何辜。更夭折之而奪以去。使人讀其遺文。慨念身世死生今昔之故。能不潸然涕下乎。初予與靜子訂交京師。在乙丑。今十有四年。乃復見靜子。而靜子鬢然黑髮白。頽然老矣。予方悲靜子之貧以老。不意別數日。而復喪其子也。靜子與余書曰。某奇貧。兒憂某衰年缺養。手自鋤闢荒山。種茶四百餘株。伏暑同工作。操鎌穫稻。薪乏。烈日登山樵採。暮弗休。或戴星月。汲井。秋旱。躬桔槔灌芋田。又竭力墾芋。觸毒暑成疾。遂不起。是某以貧累兒至死。餘生無益。何不喪我。而喪吾子哉。予讀其書而悲之。又見錢唐馮山公贈叔謙文云。叔謙性孝友。重然諾。喜爲詩文。尤好談兵事。然叔謙才可用世。宜磨礱以學問。而乃易言兵。昔張子厚少喜談兵。范文正公曰。儒者自有名教可樂。何事於兵。因勸之讀中庸。卒爲大儒。予規叔謙無以加於文正。而叔謙將來根極性命之學。用則宏濟蒼生。舍則垂教來世。尙其子厚是師哉。觀此則叔謙爲人可知。而吾於山公之文。更歎叔謙真用世之才。近代往往以儒者不知兵。執其章句腐見。貽誤國家。而禍君父。叔謙既用志於此。山公乃因己所不知。而以儒者常談沮之。使不獲深造以得其要。今且死。而吾又不能得其人與究其法以傳於後也。豈不深可惜哉。銘曰。

天旣篤生奇英。胡爲窘其遇。嗇其壽。俾不得以成名。于嗟蔡生。慧以貞。魂魄毅兮。驅長鯨。章有芷。蠡有衡。春秋有代謝。天地終無情。誰歟壽者。朝菌榮。唯鸞與鵠。飛騫鳴。峨峨廬岳。連荆衡。孤原片石。高崢嶸。

予乙酉游粵東。有廖生瀛者。持其先人柴舟先生所刻二十七松堂集謁予曰。先君子讀先生文。服膺十餘年矣。歎服不去口。日教瀛與後學錄先生文。焚香玩誦。恨未識先生面。乃今先生至粵。而先人適卒。何不幸不得見先生。一吐其胸中之奇。以質其所未逮。然又幸先生之來。得以其遺文請正。以見其生平。而因以求先生文以誌其墓。則先人死且不朽。言罷流涕。手撿其集中謬相推許之言數則示予。而長跪頓首以請。予惶悚驚歎。謝不敏。旣而讀其文。卓犖奇偉。矯矯絕依傍。議論發前人所未發。序事宗龍門。詩新警雄逸。字字性靈。而其人品學術性情神態磊落浩然之氣。畢露於行閒。於戲。豈易得之士哉。處士諱燕。字柴舟。廣之曲江人。生於崇禎甲申。時值鼎革。廣東尙爲明守。具後數更離亂。破產食貧。卒於乙酉。是爲康熙四十四年。得年六十有二。十八歲補弟子員。旣而棄去高隱。當道莫不慕之。而處士介然自守。不肯事干謁。肆力於詩古文。能絕去近代陋習。追蹤古人。予耳處士名久。未見其著作。今始見之。而處士已死。於戲。陰陽變化。四時行。百物生。文之本也。聖人畫卦造文字。蓋假借以發其蘊。而文章實不在此。作者不能仰觀俯察於日月寒暑山川草木鳥獸。以及聖人之禮樂政事。歷代人事之變遷。與一身之視聽言動求之。而區區求之字句之閒。亦未矣。故其於古人之文。得形而遺神。知方而不知其無方。乃今處士之文。何其能得我心之所同然也。且夫脩辭立其誠。聖人立言。與德功相表裏。非爲娛目邀名欺世之具。近日作者。惟甯都魏叔子先生言經濟卽可見諸用。言道德卽其所能行。而章法一準乎古。處士議論。雖間有高明之過。然實可繼魏先生以不朽。乃處士語人曰。叔子先生後。惟王崑繩一人。崑繩之文。汪洋無涯。變

幻百出。直欲駕唐宋元明而上。噫。予何敢當處士之過譽哉。顧以予之落拓。見棄於時。而萬里外有知己如此。及親至其鄉。見其子。而其人又死。悲夫。悲夫。予生平知己。不過二三人。皆先我而死。處士未謀面亦死。粵中高士屈翁山。陳元孝亦死。梁太史藥亭亦於是年三月死。粵中虛無人。而海內老成凋謝。又不獨粵中爲然。予偃偃然獨立。天荒地老。俛仰無聊。一無所成於天下。徒以文字表彰忠孝遺逸。而悲歌忼慨。呼天而莫之應。則誌處士之墓。而不禁潸然涕下也。孰知予之心哉。孰知予之心哉。處士祖父母某。父母某。元配鄧。無出繼。亦鄧。生子三。瀛。湘。清。瀛庠生。能世其學。湘殤。清幼。女子子三。銘曰。

乾曜三光。坤列九垓。造物奇譎。風雷水火。山澤草木。鳥獸各別。終則生人。爲天地心。代之喉舌。經之綸之。煥乎文章。六字有截。嗟爾蒙蒙。不知其本。求之殘歎。此道在人。乃化之根。不可斷絕。處士廖君。嶺海奇英。鍾茲滴血。磅礴萬古。睥睨百氏。雷轟岳嶽。視彼融脩。大兒小兒。何堪一擊。天賦之才。又恐其張。罄洩丹訣。遂奪其年。留茲真宰。歸諸溟沔。嗟哉廖君。惟我與爾。心解神悅。白日昭昭。幽局漠漠。靈虛洞澈。千秋尙友。矧在同時。何須而詰。九原可作。溘彼埃風。招搖獨揭。

徐雲若墓誌銘

予聞東南多隱君子。己卯至吳。故老皆無存者。有醫隱曰徐雲若。卒於前一年十有二月。其生也以丙申之八月。嗚呼。何爲其然也。按狀。君始祖諱棋。宋汴京人。靖康之亂。遷於吳。十五世祖諱達佐。元時隱居。刻志力行。不仕。張士誠據吳。益韜晦。明初。屢薦不起。後聘爲建甯儒學司訓。考諱自立。母某氏。君生而穎異。

好學志識卓犖不羣。及長棄舉子業。遭寇亂。家毀慨然曰。當今之世。欲濟物謀生以養親者。其唯醫乎。是時君父母俱存。貧無以養。乃學醫。久之術益精。每力斥庸醫習說不顧。疾應手解。人皆以爲神。遂大行。君爲人孝友尙義。與人忠。晨昏甘毳。承歡無間。父歿哀毀踰節。愛其弟甚篤。撫訓弟之子如子。人有善。揚之恐後。或正色直言其非。而患難竭力周還。無所辟。徐俟齋先生者名枋。明壬午舉人。隱山中四十餘年。以歿與君善。多病。君每攜藥入山視之。歲凡數四。以爲常。甯都會青黎寓於吳。北游客死。一女五齡。君撫之長而嫁之。其孝義爲鄉里所重。而力足以濟之者。醫也。君之識顧不偉哉。初君始祖之子諱揆。當二帝蒙塵。遮說金人留駕。金人殺之。南渡賜諡靖節。及十五世祖。當元末。與高人逸士往來。贈答篇章。曰金蘭集。久散軼。君力蒐討網羅。復成書。疾革猶託其友梓行。嗚乎。源之深者其流長。根之固者其枝榮。栗里之隱。以其祖也。下邳潛匿。亦以祖也。詩曰。無念爾祖。聿脩厥德。君之祖亦遠矣。厥德復何愧乎。君諱仁彝。別字曉石。年四十有三。配談氏張氏俱無子。弟之子承顯爲之子。承顯請予爲其墓之誌。謹按狀誌之如左。而爲之銘曰。

吳孝廉墓誌銘

貧而孝養莫豐焉。窮而惠澤莫宏焉。兼斯二者而善其術。舍良醫其曷從焉。嗟哉徐君。節之貞也。維君矢之。波之靡也。誰其砥之。人之疾也。君能已之。天之疾也。誰其起之。君兮歸矣。誰其死之。

安平吳君。吳君免若諱璠。癸酉與予同舉於鄉。三上公車不第。辛巳卒。癸未其兄爾錫來京師。請予誌其墓。流

涕謂予曰。吾弟負異才。讀書過目卽成誦。五六歲日記千餘言。十三補弟子員。年十五。經史無不通。時藝滂沛橫溢。不可遏止。未弱冠。名聲大振。試輒十數藝。半日立就。學使莫不驚歎。每試必冠其羣。文競傳寫吟誦。詩賦初宗六朝。後乃進於漢魏。盡焚其前所爲文。其於象緯山經地志兵陣風角浮屠老子之書無不究。陸博呼盧聲伎狗馬神仙劍術以及荒怪不經之說無不好。高傲簡肆。不事繩墨。豪於酒。往往罵其座人。耳熱酒闌。仰天歌嘯。意豁如也。嘗與余讀書申旦。倦則酣飲。擊劍歌呼爲笑樂。或論古人忠孝大節及抑鬱不平事。輒滿引痛哭。忽忽不懌。罷去。嗚呼。以吾弟之才。而卒鬱鬱不得志以死。豈非天乎。夫高才早死如王子安。李長吉。及近代吳明卿。侯朝宗者。何代蔑有。然卒不能掩其精光。湮沒其名者。以其文章自不朽也。吾弟雖負才而志識高遠。凡所作俱自謂不足傳。不自珍愛棄去。又不知天之不假其年。而及時策勵收拾以成一家言。乃今一旦忽焉以死。不但不能獲厚於天。卽求如古人之高才早死而卒以傳者。亦不可得。是可悲也。言罷。復欬歔泣下而拜手以請曰。子立言可不朽者。能以子之言存吾弟之名乎。予唯唯。謹按狀。君候補內閣中書舍人祖諱恂。明諸生。崇禎戊寅死深州之難。累贈奉政大夫翰林院侍講學士。考諱本植。順治戊戌進士。歷官翰林院侍講學士。母門宜人。馮宜人。君馮出也。兄玠。弟珊。妻張氏。子一元亮。君生於康熙丁未。得年三十有五。其卒也。以下第抑鬱成疾。遂不起。蓋自甲戌以後。文體大壞。以當事者欲變庸膚爲高古而不得其道。凡遇支離謬戾不可解之文。卽以爲奇才而悉拔之前列。又擇其尤不可解者。以魁天下。於是天下習爲荒經蔑理無文義之體。以爲科名捷徑。而真才夙學不肯與時